

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVIII No. 6
Marso 21, 2007
www.philippinerevolution.net

Editorial


Pamatukan ang pasistang kalakasan kag pagpanglupig

Padayon nga nagadamu kag nagalapad ang kubay sang mga organisasyon kag indibidwal sa sulod kag guwa sang pungsod nga nagakundena sa wala untat nga kampanya sang pangpulitika nga pagpamatay batuk sa katapu kag lider sang mga progresibong organisasyon. Pero tanan nga ini lunsay ginabastos ni Gloria Arroyo sa pagpasingki sang pasista nga pagpamatay, pagpamwersa kag pagpang-atake sang iya mga armadong tinawo batuk sa pumuluyo kadungan sang iya pakuno-kuno kag pakitang-tawo bahin sa “pagpaluntad sang demokrasya.”

Sining nakaligad nga sinimana, kadungan sang madamu nga pagpatay, partikular nga gintarget sang mga *death squad* sang militar ang mga nagbulig kag nagtindog nga saksi sadtong Pebrero sa imbestigasyon nga ginhimo sang United Nations sa lapnagon nga pagpamatay.

Wala pa sang duha ka simana nga nakahalin sa pungsod ang misyon nga ginpamunuan ni Prof. Philip Alston, UN Special Rapporteur for Extrajudicial Executions, ginpatay sa Digos City si Renato Torrecampo Pacaide, isa ka lider-mangunguma nga nagbulig nga mainterbyu sang misyon ang mga saksi kag pamilya sang pila ka biktima. Makalipas ang walo ka adlaw, ginpatay naman sang militar si Siche Gandinao, isa ka lider-mangunguma nga nagtestigo batuk sa AFP sa nasambit nga imbestigasyon. Nagpamahug ang militar nga igasunod pa gid nila ang isa ka saksi, ang utod ni Siche nga si Divina.

Ang pagpatay sa mga saksi sa mga pagpamatay nagapatampok sa labing kapintas kag wala’y pili sang mga pasistang pinuno kag gaway sang rehimeng Arroyo. Desperado sila nga papason ang pinakamatutom nga mga pwersa nga nagabuyagyag kag nagapakamaut sa mga pasistang krimen sang rehimen kag



iban pa nga mabug-at nga sala sini sa banwa.

Kadungan sang nagapadayon nga pagpamatay, labing ginapasingki kag ginapaspasan man sang rehimeng Arroyo ang katuwang sini nga taktika—ang paglunsar mahigko nga “ligal” kag ekstraligal nga paagi sang pagpanamad, pagpang-ipit kag pagpami-gos sa mga progresibong pwersa kag sa mga organisasyon, partido kag lider nila.

Katuyuan sang rehimen nga iduso ang mga ini sa

**Mga tampok
sa isyu nga ini...**

**Militarisasyon sa
Kamaynilaan** PAHINA 4

**Pagpang-ipit
sa mga progresibo,
ginpasanyog** PAHINA 5

**Padihut batuk kay
Satur Ocampo sa Leyte**
PAHINA 6

guwa sang ligal kag parlamento nga patag sang paghimakas, kuhaan sang ligalidad kag epektibo nga lab-ot kag impluwensya sa pumuluyo, kag ipalapa-lapa sa mga sapat sang pasistang estado. Pangunahon nga ginainitan subong sang rehimen ang mga progresibong partido pareho sang Bayan Muna, Anakpawis kag Gabriela Women's Party, labi na nga ginalauman nga makakuha ang mga ini sang dugang nga pwesto sa Kongreso.

Labaw nga ginakakulbaan sang Malacañang nga magatuhaw sa Kongreso ang isa ka signipikanteng bloke sang mga progresibo nga mahimo epektibo nga makigkumbinar sa iban pa nga pwersang anti-Arroyo agud magtukod sang mabaskog nga oposisyon sa rehimen.

Gintukod sang Malacañang ang Inter-Agency Legal Action Group (IALAG) sa pagpamuno nanday Security Adviser Norberto Gonzales kag Justice Secretary Raul Gonzalez para mag-imbento sang kon anuano nga kasong kriminal batuk sa mga progresibong partido kag indibidwal.

Madasig nga ginatinguha sang Malacañang nga makapasaka sang

mga himu-himo nga kaso batuk kanday Bayan Muna Rep. Satur Ocampo kag iban pa nga lutaw nga mga indibidwal kag lider sang progresibong partido kag organisasyon agud makambyo sa mga ini ang akusasyon sa madamu nga ekstrahudisyal nga pagpatay sa mga aktibista kag maabswelto ang rehimen kag mga berdugo sini. Sa sini, ginapaimbento sang Malacañang sa IALAG ang madamu nga himu-himo nga istorya kag kaso kriminal bahin sa nakutkot kuno nila nga "mass grave" ukon tambakan sang mga bangkay sang mga ginsuspetsahan nga ahente sang militar nga ginpatay kuno sang BHB.

Ang himu-himo nga kaso nga ginpasaka batuk kay Ocampo kag 51 nga iban pa nga kaangot kuno sa purgahan sa Bag-ong Hangaway sang Banwa sa Leyte masobra duha ka dekada na ang nagligad amo ang isa lamang sa 1,500 kaso nga ginahanda sang IALAG batuk sa mga progresibong pwersa.

Pagpreparar man ang mga ini sang rehimeng Arroyo sa plano nga

ideklarar nga iligal ang mga progresibong organisasyon bangud ang mga ini mga "prente" kuno sang Partido Komunista sang Pilipinas. Plano nga gamiton sang Malacañang bilang instrumento ang pasista nga Anti-Terror Law, sa tion nga magaepekto ini sa Hulyo. Makapadaug man sang madamu nga tiglawas sa Kongreso ang mga progresibong partido, igatapalan ang pagtawag sa ila bilang mga "terorista" agud mapahalin sila tanan, pareho sa ginhimo nga pagsipa sa mga tiglawas sang Democratic Alliance sad-tong 1950.

Pero indi basta-basta nga mahimo ini sang rehimen. Padayon ini nga mabaskog nga pagapamatukan sang mga progresibong pwersa kag pumuluyo nga nataman sang kaakig sa sobrang brutal, mapiguson kag tuso nga rehimen.

Ginapakita sang pumuluyong Pilipino ang mataas nga lebel sang determinasyon kag militansya. Bug-os kaisog nila nga ginabatuan ang sobrang paggamit sang rehimen sa tanan nga gahum sang pasistang estado. Wala'y kakapoy nga ginabuyagyag nila ang kada nahot sang kabutigan kag todo-todo nga ginasumalang sang ngipon-sa ngipon ang kada maitom nga padihut, kada mahigko nga taktika, kada pagpangtorse sang layi kag kada pasista nga krimen sang renimeng Arroyo.

Sa bahin sang rebolusyonaryo nga armadong kahublagan, labi pa sini nga pasanyugon ang mga taktikal nga opensiba sa bilog nga pungsod agud pangapinan ang pumuluyo, silutan ang mga pasistang kriminal, mag-amot sa pagpadasig sang pagkapukan sa rehimeng Arroyo kag labi nga isulong ang rebolusyong Pilipino. **AB**



Tuig XXXVIII No. 6 Marso 21, 2007

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editoryal

Pamatukan ang pasistang kalakasan kag pagpanglupig **1**

Rehimeng Arroyo, nagakahamulag na sa kalibutan **3**

Militarisasyon sa Kamaynilaan **4**

Pagpanghalit sang pasista nga estado

Pagpang-ipit sa mga progresibo **5**

Plano batuk kay Ka Satur **6**

Testigo ni Alston, ginpatay **7**

Balita **8**

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Rehimeng Arroyo, nagakahamulag na sa kalibutan

Pareho sang natabo sadto kay Marcos kag sa iban nga pasistang diktador sa nagligad, madasig subong nga nagakahamulag si Arroyo sa bilog nga kalibutan bunga sang pagkabuyagyag sang mga pasistang krimen sini. Nagakaubusan na si Arroyo sang kadampig samtang nagadamu ang mga organisasyon, mga upisyal sang gubyrerno kag prominente nga personalidad nga nagapahayag sang pagkaalarma kon indi man hayagan nga pagpamatuk sa iya diktadurya.

Ang internasyunal nga pagkahamulag sang rehimeng Arroyo malahalon nga kadalag-an sang pumuluyong Pilipino. Sa kasaysayan sang kalibutan, nahilera na si Arroyo sa labing ginakangil-aran nga diktador pareho nanday Marcos kag Pinochet.

Pagbista sa Senado sang US. Sining Marso 14, ginhiwat sang Committee on East Asian and Pacific Affairs sa Senado sang US ang isa ka pagbista bahin sa mga kaso sang pagpamatay sa Pilipinas. Pinangunahan ini sang anti-Bush nga senador nga si Barbara Boxer, Assistant Majority Leader sang Democratic Party. Ginhiwat ang imbestigasyon sa pagduso man sang mga organisasyong Filipino-American sa US, mga organisasyong relihiyoso kag mga progresibong organisasyon.

Lakip sa mga nag-atubang sa pagbista nga ini amo sanday Bishop Eliezer Pascua, pangkabilugan nga sekretaryo sang United Church of Christ in the Philippines (UCCP); Marie Hilao-Enriquez, pangkabilugan nga sekretaryo sang Karapatan, kag isa ka upisyal sang Amnesty International (AI). Ginbaton man sang komite ni Senador Boxer ang pang-umpisa nga report ni Prof. Philip Alston, ang UN Special Rapporteur on Extrajudicial Executions. Nagpadala man sang testimonya nga nakabidyo si Bayan Muna Rep. Satur Ocampo nga wala makatambong sa pagbista bangud

sa ginpagguwa sang korte nga mandamyento de aresto.

Ginbuyagyag sang mga nagtestigo ang tuman kadamu nga kaso sang pagpamatay, lakip ang pagpagtay sa 25 katawong-simbahan nga lunsay myembro sang UCCP, amo man ang masobra 129 katapu sang Bayan Muna. Lunsay gintumod sang mga nagtestigo nga responsable sa pagpamatay sang ginatus-gatos nga mga aktibista ang mga elemento sang militar sa Pilipinas. Ginpakamalaut ni Ocampo ang waay pagpili sang rehimeng Arroyo lunsay sa mga armado kag di-armado nga pwersa kag ang pagbilang sini sa Bayan Muna kag iban pa nga hayag nga progresibong partido kag organisasyon bilang mga prente nga komunista. Siling niya, ini ang ara sa likod sang nagapadayon nga pagpamatay kag pagpang-ipit sa mga aktibista sang Bayan Muna, pati na sa mga tiglawas sini sa Kongreso.

Bilang sabat, ginaparepaso ni Senador Boxer sa State Department ang ayuda-pinansyal sang US sa Pilipinas. Siling niya, kinahanglan lantawon kon ang buhis sang pumuluyong Amerikano ginagamit sa pangpulitika nga pagpamatay kag paglabag sa tawhanong-kinamatarung sa Pilipinas.

Bisan wala gin-imbitar, nagpadala ang rehimeng Arroyo sang mga upisyal sang pulis sa pagpanguna ni PNP Deputy Dir. Gen. Avelino Ra-



zon Jr. nga namuno sa Task Group Usig kag Dir. Edgar-do Doromal sang Criminal Investigation and Detection Group (CIDG). Bangud diri, kinastigo ni Senador Boxer ang gubyrernong Arroyo sa pagpadala sini sang mga di-imbitado nga pulis sa bista nga siling

niya makapakulba lamang sa mga nagatestigo didto.

Anti-Terror Law, ginapabasura sang UN Special Rapporteur. Pila ka adlaw antes sini, nanawagan si Prof. Martin Scheinin, ang United Nations Special Rapporteur on the Promotion and Protection of Human Rights and Fundamental Freedoms while Countering Terrorism, nga ibasura ang *anti-terror law* nga siling niya lapas sa mga internasyunal nga pagsulundan kag sukatan para sa tawhanong-kinamatarung.

Sa isa ka pahayag, gintumod ni Professor Scheinin ang mga probisyon nga Human Security Act (HSA) nga direktang baliskad sa mga probisyon sang International Covenant on Civil ang Political Rights (ICCPR) kag wala nagaayon sa mga pangkalibutanon nga sukatan sang tawhanong-kinamatarung. Lakip sa mga ini ang tuman kalapad nga depinisyon sang mga teroristang hilikuton nga baliskad sa Article 15 sang ICCPR.

Siling niya, ang eksedo nga pagtakda sang 40 tuig nga pagkabilanggo ano man ang bug-at sang kaso mahimo magsobra sa iban nga kaso. Ginkwestyon man niya ang kawad-on sang ikasarang kag makiisa-ka-bahin sang mga ahensya nga ginatugyanan ng maglantaw sa mga kaso sang mga detenidong suspek

bangud ang mga ahensya nga ini kabahin sang ehekutibo. Baliskad kuno ini sa garantiya nga ginatakda sang Article 9 sang ICCPR nga naga-saad nga ang kagamhanan nga ini dapat itugyan sa hudikatura.

Ginpakamalaut man niya ang probisyon nga nagalimita sa paghulag sang mga ginasuspetsahan bisan pa wala sang malig-on nga pagkasala. Antes magpagguwa si Scheini sang pahayag, madumduman nga nagpagguwa man sang pang-umpisa nga report si UN Special Rapporteur on Extrajudicial Executions Philip Alston nga nagatumod sa bilog nga establisyemento militar bilang responsable sa mga pagpamatay sang mga aktibista. Ang UNHRC Special Rapporteur para sa mga kaso sang *enforced disappearances* ukon pagkuot nagabuyok man mag-imbestigat sa Pilipinas bangud sa tuman kadamu sang kaso sang mga pagkuot nga ginahimo sang mga armadong pwersa sang estado.

Sa New Zealand kag European Union. Isa ka prominente nga personahe sa New Zealand, si Prof. Jane Kelsey, ang nagsulat kay Prime Minister Helen Clark agud hingyuon sa iya nga liwat sugilanonon si Gloria Arroyo bahin sa mga paglabag sang tawhanong-kinamatarung sa Pilipinas. Madumduman nga nauna nga nagpahayag sang kabalaka si Prime Minister Clark sang magkadto siya sa Pilipinas sadtong nagligad nga tuig. Pero suno kay Professor Kelsey, wala pulos ang ginhatag nga kasiguruhan ni Arroyo kay Clark. Ginhingyo niya nga liwat sugilanonon ni Prime Minister Clark si Arroyo kag ipamilit nga dapat untaton ang mga pangpulitika nga pagpamatay sang mga progresibong aktibista.

Pati ang European Commission, mga gubyrno kag parlamento lakip ang mga ara sa Canada, Belgium, Finland, New Zealand kag madamu man nga mga organisasyon sang

simbahan sa nagkalain-lain nga bahin sang kalibutan ang nagpabut-yag sang pagkunderar kag nagaplano man sang ila taga ka imbestigasyon sa mga nagakatabo nga kalakasan sang estado kag pagpanglupig sang rehimeng Arroyo sa mga progresibong pwersa kag sibilyan.

Permanent People's Tribunal. Nakatalana ng ilunsar sa mga masunod nga adlaw ang ikaduha nga sesyon sang Permanent People's Tribunal (PPT) ng nauna nga nagkiha sa rehimeng Arroyo. Lakip ang mga kaso sang pagpamamtay kag paglabag sa mga tawhanong-kinamatarung sa mga kaso nga pagbistahon sang PPT. Luwas sa pagsumiter sang pinal nga report nila sa UNHRC, magasumiter man ang Alston Mission sang kopya sini sa PPT.

International Parliamentary Union. Sa maabot nga Mayo, magabisita liwat sa pungsod ang mga tiglawas sang International Parliamentary Union agud imbestigahan ang padayon ng pagkahunong kay Rep. Crispin Beltran sang Anakpawis kag ang ginpaska nga kaso batuk kay Rep. Satur Ocampo sang Bayan Muna.

ALRC. Gintawag man nga garuk sang Asian Legal Resource Center ang sistemang hudisyal sa Pilipinas bangud sa pagkainutil sang pulisya kag mga korte nga imbestigahan kag lubaron ang mga paglabag sa tawhanong-kinamatarung. Ang ALRC, nga nagpagguwa sang 192 pahina nga report sa sistemang hudisyal sa Pilipinas, isa ka organisasyon sang mga abugado.

Militarisasyon sa Kamaynilaan

Mabaskog nga ginkastigo sang mga residente sang mga imol nga komunidad sa Metro Manila ang padayon nga militarisasyon sa ila mga lugar kag ang pagpang-ipit sa mga lider kag myembro sang mga progresibong partido. Indi matabunan sang AFP ang maitom nga katuyuan sang nasambit nga deployment sang mga suldado bisan pang-upisina nga uniporme lamang ang ginapasuksok sa ila sa baylo nga uniporme pangkombat.

Sa Tondo, ginpamilit sang mga residente upod ang mga tawong-simbahan kag mga nagasakdag sang tawhanong-kinamatarung ang pagkuha sang mga SOT nga nagatenir diri halin pa sadtong Nobyembre. Ginadumilian sang mga suldado ang mga tawo nga mag-upod sa mga protesta kag nagapangkampanya sila batuk sa mga progresibong partido.

Pagasuguran man sang Kabataan Party sadtong Marso 12 ang kampanya para mangalap sang isa ka milyon nga pirma batuk sa presensya sang militar sa mga eskwelahan kag barangay sa Metro Manila.

Ginpakamalaut sang Kabataan Party ang pagpamahug kag pagpanilag nga ginahimo sang mga suldado sa mga lider kabataan. Sa tanan nga mga porum nga ginaisponsor sang AFP sa mga eskwelahan, maisog sila nga gin-atubang sang mga estudyante kag ginhimutig ang ila mga pagpangtiko batuk sa mga progresibong organisasyon.

Ginaplano man sang AFP nga magdeploy sang SOT sa mga komunidad nga Moro sa Metro Manila, suno kay Maj. Gen. Delfin Dolorfino, kumander sang NCR Command. Pagakadtuan kuno nila ang mga moske para "magadayalogo" sa mga tawo pareho sang ginahimo nila sa mga eskwelahan sa Metro Manila kon sa diin ginasamaran nila ang mga progresibong partido kag ginapahug ang mga estudyante para indi mag-entra sa mga militanteng organisasyon.

AB

Pagpang-ipit sa mga progresibo, ginpasanyog

Samtang nagahilapit ang eleksyon sa Mayo, labi nga naging singki ang mga kaso sang pagpanglupig kag pagpang-ipit sa mga kandidato kag katapu sang mga progresibong partido.

Sining Marso 16, gin-aresto sang mga tinawo sang Philippine National Police (PNP) si Bayan Munina Rep. Satur Ocampo base sa himu-himo nga kaso sang pagpatay nga ginpasaka sa Leyte batuk sa iya, kay Prof. Jose Ma. Sison kag iban pa. Gindakup si Ocampo matapos siya magpasaka sang petisyon sa Korte Suprema agud kwestyunon ang iya kaso kag magpresentar sang mga ebidensya nga mag-aabswelto sa iya.

Ginmandu sang korte nga temporaryo siya nga ipabilin sa kustodiya sang PNP sa National Capital Region samtang nagahulat sang pagbista sang Korte Suprema sa iya petisyon. Sa pihak sini pwersahan siya nga ginsakay sa isa ka eroplano pakadto sa Leyte sadtong kaaganhon sang Marso 19. Nagpalusot ang pulisya nga wala pa kuno nila nabaton sadto ang upisyal nga mandu sang korte. Napilitan ang PNP nga ibalik si Ocampo sa Maynila sa tunga-tunga sang byahe sang mabaton na nila ang nakasulat nga order sang korte sa Leyte nga indi na dapat dayunon ang pagdala kay Ocampo didto.

Luwas sa ligal nga sablag, nagapatung-patong gihapon ang mga pangpulitika nga salabton sang rehimen sang

kastiguhon sang nagkalain-lain nga sektor ang makahas nga tikang sang gubyernong Arroyo batuk kay Ocampo.

Ang Cabinet Oversight Committee on Internal Security (COCIS) kag Inter-Agency Legal Action Group (IALAG) sang Malacañang ang utok sa pagpasaka sang kaso batuk kay Ocampo kag 51 iban pa. Ginakusahan si Ocampo na nagmandu sang pagpatay sa mga tawo nga nakutkot sa isa kuno nga "mass grave" sa Sapang Daku, Barangay Caulisian, Inopacan, Leyte. Ginpagguwa sang AFP nga ang mga nakalubong didto amo mga biktika sang "purgahan" sa kubay sang Bag-ong Hangaway sang Banwa.

Mabaskog man nga ginkundernar ni Professor Sison ang ginpasaka nga kaso batuk sa ila. Siling niya, ginagamit ini sang rehimeng Arroyo agud tabunan ang nagalang kaso sang ekstrahudisyal nga pagpamatay sa pungsod.

Pareho ni Sison, ginhatagan-tum-ok ni Ocampo na siya sadto

nakahunong sa *maximum security prison* sang militar. Suno man sa petisyon ni Ocampo, puro kabutigan ang pasibangud sang militar bangud lima sa mga kalabera nga ebidensya sa kaso nga pagpatay batuk sa iya sa Inopacan, Leyte ang daan na kuno nga nakutkot sang militar sa Barangay Montecrico, Baybay, Leyte sadtong 2002. "Nagsaylu-saylo si (AFP Chief of Staff Hermogenes) Esperon sang mga bungo," siling ni Ocampo.

Luwas diri, siling ni Ocampo, ang piskal nga nagakapot sang kaso sa Baybay amo man ang nagakapot subong sang kaso sa Inopacan, kag pareho man ang testigo sa duha ka kaso. Pero wala ginhambal sang nasambit nga testigo ang ngalan ni Ocampo sadtong 2002.

Suno naman sa mga residente sang Inopacan nga nainterbyu sining karon lang sang *Ang Bayan*, indi "mass grave" sang mga biktika sang purgahan ang lulubngan nga ginkutkot sang militar sa Inopacan kundi ordinaryo nga sementeryo.

Grabe nga pagpamahug kag pagpaandam ang ginahimo sang militar sa pumuluyo didto para pungan sila nga maghambal kag ipangin-wala ang kabutigan. Sa kamatuoran, madamu sa mga residente ang nagbakwit bangud sa kahadlok.

Suno naman sa Mt. Amandewin Command, lokal nga kuman sang BHB sa Leyte, ang saksi nga ginprisantar sang militar nga si





Zacarias Piedad dati nga myembro sang BHB nga ginpahalin bangud sa pagtraidor kag mabaskog nga paglabag sa mga pagsulundan sang BHB. Naimbolbar siya sa nagakalain-lain nga buhat kriminal kag may tion nga nahunong siya bangud sa pagpangawat. Ginrekrut siya sang AFP bilang elemento sang CAFGU kag nangin aktibo siya nga bayaran nga ahente sang militar. Sadtong panahon nga kuno nasaksihan niya ang pagmandu ni Ocampo sa pagpamatay, wala siya nadestino sa nasambit nga lugar.

Kadungan sang ginpasingki nga harasment kay Ocampo, ginapanilagan man ang mga upisina sang mga progresibong partido. Pila ka adlaw nga ginabantayan sang mga elemento sang CIDG ang mga upisina sang Kilusang Mayo Uno, Kilusang Magbubukid ng Pilipinas, Anakpawis kag iban pa nga organisasyon. Sakay sila sa salakyan sang mga nagapaniktik samtang ginakuhahan sang retrato ang mga nasambit nga upisina.

Sa Batangas City, hinaras sang AFP ang mga katapu sang Samahang Magsasaka sa Batangas-KMP samtang nagakampanya sila.



Pagdumog kay Ka Satur sa Leyte, ginplano sang Malacañang

Isa ka bayaran nga grupo sang mga *vigilante* ang nagahulat tani sa paghugpa ni Ka Satur Ocampo sa Hilongos, Leyte sadtong Marso 19 agud dumugon siya kag pakahuy-an. Suno sa mga report, isa ka adlaw antes ang nakatakda nga pagdala didto sa progresibong mamalidha, nagpaskil na sang mga poster sa bilog nga banwa ang mga tim sang mga suldado nga nagapakahuya sa iya kag isa ka *van* ang nagalibot kag nagabrodka sang mga pagpanamad sa iya. Ini para magtuga sang kundisyon para sa maitum nga padihut sang Malacañang nga dumugon kuno si Ka Satur sang mga akig nga residente. Sa aktwal, ang mga ini nga grupo sang mga anti-komunista nga *vigilante* nga ginapahulag sang AFP agud dumugon si Ka Satur sa tion nga mag-abot siya sa Hilongos. Ang plano pagguwaon sang PNP nga nadulaan na sila sang kontrol sa pagdagsa sang mga tawo kag indi na nila naprotektahan si Ka Satur.

Gindali-dali tani sang Malacañang nga ilusot ang ila marigkam nga padihut antes mag-abot ang nakasulat nga mandu sang korte nga ihunong anay si Ka Satur sa Maynila. Sa ulihi nag-abot ang mandu samtang ara sa ere na ang eroplano nga ginasakyan ni Ka Satur kag ginaulan sang mabaskog nga pakamalaut sa nagkalain-lain nga sektor ang ginhimo nga makahayup nga pagtrato sa iya. Gani napilitan ang Malacañang nga iatras ang plano kag ginmandu ang pagpabalik kay Ka Satur sa Maynila.

AB

Ginpakamalaut naman sang Anakpawis ang harasment sa ila partido. Siling ni Rep. Rafael Mariano, ginalagas sang Malacañang kag AFP ang ligal nga kahublagan kag kabahin sang pasistang pagatake diri ang diskwalipikasyon, pagpatay kag pagpamigos. Nagabalik, siling niya, ang panahon sang layi militar bangud sa padayon nga mga atake ni Arroyo sa pumuluyo. Nangako siya nga batuan kag paslawon sang Anakpawis sang mga pagpang-atake nga ini.

Sa Iloilo City, ginpakamalaut sang mga militanteng organisasyon ang tuyo sang mga gaway sang rehimeng Arroyo nga sunugon ang upisina kon sa diin ginahanda ang mga istrimer, poster kag iban pa nga materyales ng pangkampanya sang Bayan Muna, Gabriela Women's Party, Anakpawis kag Kaba-

taan Party sa Barangay Sto. Nino Sur, Arevalo District. Ginhabuyan sang mga nakamotorsiklo ng lalaki sang mga molotov ang upisina sadtong kaaganhon sang Marso 18. Bahin nga nasunog ang bubong sang upisina.

Nagapanguna ang BM, Anakpawis kag Gabriela Women's Party sa mga ulihi sarbey sang SWS kag Pulse Asia. Nagguwa sa mga sarbey nga ini nga nalabawan pa subong sang tatlo nga nagapangunang partido ang mga naangkon nila sadtong eleksyon sang 2001 kag makapwesto sila sang maksimum nga tig-tatlo ka tiglawas sa Kongreso. Sa sarbey sang Pulse Asia lakip man ang Kabataan Party sa mga bag-o nga partido nga mahimo magadaug sa eleksyon sa *party-list*.

AB

Testigo sa imbestigasyon ni Alston, ginpatay

Ang makangingidlis nga pagkapatay sa isa ka testigo nga taga-Misamis Oriental nga nag-atubang sa Alston Mission agud itum-ok ang AFP sa mga kaso sang ekstrahudisyal nga pagpatay ang pinakatampok sa pinakaulihi nga mga kaso sang kalakasan militar ng nakalap sang Ang Bayan halin sa ulihi nga bahin sang Pebrero tubtub una nga bahin sang Marso.

Marso 13. Ginpatay sang apat nga nakamotorsiklo si Carlito Getrosa sa Barangay Midpapan, Pigcawayan, North Cotabato. Si Getrosa, 49, myembro ang Bayan Muna. Ginluthang siya sa atubang sang iya family kag mga abyan sa iya balay.

Lunsay nakamotorsiklo kag *na-ka-combat boots* ang apat nga kriminal nga nagpalagyo sakay sa duha ka motorsiklo.

Marso 10. Ginpatay si Siche Bustamante-Gandinao sang isa ka elemento sang *death squad*. Natabo ang pagpamatay pila ka dupa lang halin sa isa ka detatsment sang 9th IB sa Sityo Nabuolan, Barangay Guinalaban, Salay, Misamis Oriental. Ginluthang si Gandinao samtang nagalakat siya upod ang iya asawa kag mga anak pauli sa ila puluy-an hakin sa ila talamnan. Apat ka bala ang nag-igo sa iya ulo kag lawas.

Si Gandinao, 56, myembro sang Misamis Oriental Farmers Association (MOFA) kag sang Bayan Muna. Ang pagpatay kay Gandinao ginhi-mo nga pa sang isa ka bulan makaligad siya magtestigo sa ginhiwat nga imbestigasyon ni Prof. Philip Alston, Special Rapporteur on Extrajudicial, Summary or Arbitrary Executions sang United Nations Human Rights Council.

Testigo si Gandinao sa pagpatay sadtong Pebrero 8 kay Dal-

macio "Tatay Daki" Gandinao, tagapangulo sang MOFA kag *provincial coordinator* sang Bayan Muna sa Misamis Oriental. Katulad ni Tatay Daki, si Siche aktibo sa kampanya batuk sa militarisasyon kag sa mga paglabag sang militar sa tawhanong-kinamatarung sa ila lugar.



Suno kay Elda, anak sang biktima, nakita niya nga ginsundan sila sang kriminal nga nakamotorsiklo pagkaligad nga mag-agi sa detatsment. Nagpalagyo ang kriminal pakadto sa direksyon sang detatsment matapos ang pagpangluthang. Sang magtawag sang tabang si Elda, isa pa ka motorsiklo ang nagpalapit sa ila kag pagkatapos nagkadto sa detatsment. Bumalik ang motorsiklo nga ini sa ila upod ang isa pa nga nakamotorsiklo nga sakay mismo ang kriminal.

Kuno ginakasuhan na sang rehimen sang pagpabaya ang duha ka elemento sang CAGU kag isa ka suldado nga nakadestino sadto sa "kapaslawan" nila nga magresponder sa pagpangayo ni Elda sang tabang.

Pangaduha na si Siche Gandinao sa mga nagbulig sa imbestigasyon ni Prof. Alston nga ginpatay. Nauna nga ginreport sang AB ang pagkapatay sini lamang Marso 2 kay Renato Torrecampo Pacaide, pangkabilugan nga tiglikum sang Nagkahiusang Mag-uuma sa Davao

del Sur kag *provincial coordinator* sang Anakpawis. Isa si Pacaide sa mga nag-asikaso sa mga interbyu sang Alston Mission sa mga testigo sa ekstrahudisyal nga pagpamatay.

Marso 2. Ginpatay sang isa ka elemento sang *death squad* sa Morong, Bataan si Felisa Ocampo, 59, *coordinator* sang Bayan Muna sa nasambit nga banwa. Ginluthang siya sa atubangan sang tindahan sang iya utod mga alas-7:30 sang aga. Suno sa mga saksi, nagsakay sa isa ka kotse ang kriminal kadungan ang tatlo nga iban pa. Kasunod sang kotse ang isa ka motorsiklo nga may sakay nga duha pa ka lalaki. Antes ini, apat ka suldado ang nagpangita kay Ocampo sa iya balay sadtong Marso 1. Nagtulog sa balay sang iya utod si Ocampo sadtong gab-i ng nga ina pero didto man siya naabtan masunod nga adlaw sang mga berdugo.

Pebrero 26. Gintuyo nga kuoton kag patyon sang apat ka lalaki nga armado sang mga armalayt si Eduardo Macapagal, 56, sa iya balay sa Barangay Bulaus, Masantol, Pampanga. Napilitan nga magatras kag nagpamahug na lamang ang mga lalaki sang magbalibad ang iya pamilya nga buhian si Macapagal. Nahibal-an sang pamilya nga ang salakyan nga gingamit sang apat nga lalaki ginatag-iyahan sang barangay nga ginhulam sadtong adlaw nga isa sang isa ka Sergeant Lumasac. Suno sa kapitan sang barangay, si Lumasac isa sa mga suldado nga nakadeploy sa Macabebes, Pampanga agud pungan kuno ang mga pangpulitika nga pagpamatay. Suno sa Anakpawis-Central Luzon, maathag ginapakita sang kaso nga ini ang direktang angot sang mga suldado sa mga pagpamatay. AB

Pagdinaya sa eleksyon, nagabwelo na

Kaaganhon sadtong Marso 11, gintugbang sang kalayo ang daan nga biling sang Comelec sa Maynila. Naabo ang madamu nga importante nga dokumento lakip ang mga balota nga magaserbi tani nga ebidensya sa dayaan sa eleksyon sadtong 2004 kag mga papeles sa beripikasyon sang mga grupo nga gusto mag-entra sa eleksyong *party-list*.

Makaduluda ang wala gilayon nga pagresponder sang mga bumbero nga naka-istasyon isa ka kanto lamang ang kalayuon sa biling. Tuman kadaku ang kalayo sang mag-abot ang mga bumbero sa lugar. Suno mismo sa kumander sang istasyon sang bumbero, talagsa sa nasambit nga lugar ang mga sunog nga indi gilayon ma-report sa ila. Ang indi mapaathag nga paghalin sang mga Marine nga nagagwardya sa biling antes mag-ibwal ang sunog nagapaligon sa pagpati sang madamu nga ang sunog kahimuan sang mga tinawo sang gubyerno. Luwas sa posibilidad nga kabahin ini sang pagtinguha sang Malacañang nga tabunan ang dinayaay sadtong 2004, mahimo nga ti-

kang man ini para indi madayon ang eleksyon sa Mayo, kon sa diin daku ang padaug sang mga pangontra ni Gloria Arroyo.



Isa ka simana naman antes ang sunog, tatlo ka empleyado sang National Printing Office (NPO) sng nadakpan nga nagakopya sang mga *serial number* sang mga balota nga pagagamiton sa maabot nga eleksyon. Ginapatihan nga paghanda para sa paghimo sang mga peke nga balota nga pagagamiton sa pagdinaya.

Ang NPO, nga amo ang upisyal nga taga-imprenta sang mga dokumento para sa eleksyon, ginapamunuan ni Felipe Evardone nga dalahig sa mga kaso sang kagarukan sa iya upisina. Utod siya ni Gov. Ben Evardone sang Eastern Samar nga subong campaign manager sang TEAM Unity sang administrasyong Arroyo. Ang pagnombrar sa iya sa nasambit nga pwesto kabahin man sang paghanda para dayaan ang nagahilapit nga eleksyon.

3.4 milyon nga pamilya, ginagutom—SWS

NAGALAB-OT sa 19% ukon 3.4 milyon nga pamilya sa Pilipinas ang nakaagi sang gutom sining nagligad nga tatlo ka bulan. Ini ang resulta sang sarbey nga ginhimo sang Social Weather Station (SWS) halin Pebrero 24 tubtub 27. Ini na ang pinakamataas nga tantos sang kagulutmon nga narekord sang SWS halin sadtong 1998.

Pinakamalala ang gutom sa Kamaynilaan kon sa diin nagtaas ang porsyento sang mga pamilya nga ginagutom halin 17.7% sadtong Nobyembre 2006 pakadto sa 20.7% sining Pebrero. Nagtaas man ini halin 17.7% pakadto sa 18.3% sa iban pa nga lugar sang Luzon. Sa baylo nga atubangon ang nagagrabe nga problema sang kagulutmon, may gana pa si Arroyo sa pagsiling nga kon ngaa daw daku ang numero sang mga nagakagutman bangud mas ginagastuhan sang pumuluyo ang mga luho pareho sang *cellphone*, alak kag sigarilyo.

Pilipinas, ang pinaka-korap nga pungsod sa Asia

ANG Pilipinas na subong ang pinaka-korap sa 13 pungsod sa Asia nga ginsarbey sang Political and Economic Risk Consultancy (PERC), suno sa report sini sadtong Marso 13. Nalabawan sang tuman sang Pilipinas ang Indonesia nga nagapangaduha subong upod ang Thailand. Ginkumpirma lamang sang PERC ang daan na nga nabuyag-yag nga lapnagon nga korapsyon sang rehimeng Arroyo kag ang pakitang-tawo nga kampanya sini batuk sa korapsyon nga gintalanaan pa sang P2 bilyon.

Ginhimo ang sarbey sang PERC halin Enero tubtub Pebrero kon sa diin gin-interbyu nila ang masobra 1,400 nga dumuluong nga negosyante sa Asia. Kadam-an sa ila nagpabutyag nga naglala ang korapsyon sa Pilipinas sa pihak sang paliwat-liwat nga pagpabugal sang rehimeng Arroyo nga ginatapna sini ang korapsyon.

Madamu ang nagakangil-ad kay Arroyo

PATIMAAN sang sobra nga pagkahamulag sang peke nga presidente nga si Gloria Macapagal-Arroyo, ginsinggit kag ginpakahuy-an siya sang mga nagtambong sa isa ka aktibidad nga ginkadtuan niya.

Sadtong Marso 8, Adlaw sang Kababaihan, sa baylo nga palakpak ang isug-alaw sa iya sang linibu-libo nga empleyado singgit kag kahuy-anan ang nabaton niya sa Ninoy Aquino Stadium sa Manila. Ginalauman ni Arroyo nga malipay ang mga tumalambong bangud sa iya programang *microfinancing*, pero daku niya

nga kakibot sang wala sang naagum nga benepisyo sa iya ginapabugal nga programa bisan isa sa mga nagtambong. Ginpamangkot man sila ni Arroyo kon nakabaton sila sang P1,000 kada bulan nga dugang nga sweldo. Ang sabat sang kababaihan amo ang matunog nga "Wala!"

Agud takpan ang kahuy-anan ni Arroyo, ginpagguwa na lang sang iya mga tagapamaba nga sala kuno nga grupo ang iya ginkadtuan. Ginpulong kuno ni Arroyo ang mga nag-organisa sang aktibidad kag tuman nga gin-akigan sila.

Kahayupan sang 74th IB sa San Narciso, Quezon

ISA ka Pulang hangaway ang nadakup sang kaaway sa isa ka engkwentro sa San Narciso, Quezon ang nangin biktima sang grabe nga kahayupan sang mga topa sang 74th IB. Si Roval Belaryo (Ka Elor), gradweyt sang Philippine Normal University, naigo sang salakayon sang pasistang militar ang ginapwestuhan sadtong kaaganhon sang Nobyembre 25, 2006. Natigayon pa siya nga maatras sang iya mga kaupod agud mapalayo siya kag iban pa nga pilason kag mapabulong. Pero sang balikan siya wala na siya makit-an.

Nakuha sang militar nga buhi ang pilason nga si Ka Elor kag ginpaidalum sa grabe nga tortyur. Suno sa panaysayon sang mga mangunguma nga nakasaksi, sang indi mapaako sang mga berdugo si Ka Elor sang ila ginpamangkot, ginpalapa-lapa siya sa idu nga dala-dala sang mga suldado kada mag-operasyon ang mga ini. Nagapinalakpak ang mga demonyo nga militar samtang ginalantaw nila ang tuman nga pag-antos sang kaupod tubtub nga mamatay ini.

Agud tabunan ang ila kahayupan, ginpagguwa sang 74th IB nga may engkwentro nga natabo sadtong Nobyembre 29 kag diri namatay si Ka Elor.

Dugang nga talangison ang nabaton sang pamilya ni Ka Elor sang isa ka bulan sila nga pabalik-balik sa munisipyo sang San Narciso antes nila makuha ang iya bangkay para mapalubong. Ini bangud indi makahatag sang *death certificate* ang mga mediko-ligal sang pulisyo sang San Narciso bangud wala nila marekord nga ang matuod nga rason sa pagkamatay ni Ka Elor amo ang paglapalapa sa iya sang idu. Sang ulihi nakuha man sang pamilya ang iya lawas sa pagpamilit sang mga tagasakdag sang tawhanong-kinamatarung, pero wala sang pagsambit sa *death certificate* bahin sa matuod niya nga ginkamatay.

Mga sibilyang Afghan, ginpangluthang sang mga suldado nga Amerikano

INDI magnubo sa 16 ka sibilyang Afghan ang namatay kag 34 ang grabe nga napilasan sang pangluthangon sila sang mga suldado nga Amerikano sadtong Marso 4 sa Jalalabad, Afghanistan. Wala pili nga ginpangtiro sang mga suldado ang tanan nga salakyan nga nagaagi sadto sa isa ka matawo nga haywey matapos maengkwentro nila ang mga gerilyang Afghan. Ang nasambit nga mga tropa kabahin sang mananakup nga koalisyon nga ginapamunuan sang US.

Tyempo nga nakuhaan sang retrato sang mga potographer sang Associated Press ang natabo nga masaker, partikular ang pagpangluthang sang mga tropa sang US sa isa ka salakyan nga may lulan nga tatlong sibilyan. Pero kinumpiska ang mga kamera sang mga potograper kag pagkatapos ginpanas ang mga retrato sang pagpangluthang. Gindumilian sila nga ipagguwa ini sa telebisyon ukon pahayagan.

Ginkastigo sang mga potograper ang pagsamad sang ila mga retrato kag plano nila nga pasakaan sang kaso ang mga suldado.

Sang maglapta na sa publiko ang balita, naglunsar ang mga Afghan sang mga aksyong protesta agud kundenahon ang masaker. Ginkundenar man nila ang padayon nga okupasyon sang US sa ila pungsod kag ang pagpakighimbon sang mga idu-ido nga rehimen ni President Hamid Karzai sa mga mananakup.

Masunod nga adlaw, siyam pang sibilyan ang napatay sang bombahon sang mga pwersang mananakup ang isa ka balay sa prubinsya sang Kapisa, sa naaminhan sang Kabul. Masobra 800 sibilyang Afghan ang napatay sadtong 2006 bangud sa mga atake sang mga mananakup.

Pagbisita ni Bush sa Latin America, ginsug-alaw sang protesta

INSUG-ALAW sang dalagku nga aksyong protesta ang pagbisita ni Pres. George W. Bush sang US sa lima ka pungsod sa Latin America sadtong ikaduha nga simana sang Marso. Masobra 6,000 nga pumuluyo ang nagmartsa sa Sao Paolo, Brazil agud kundenahon si Bush. Sa syudad sang Porto Alerge, ginsunog ang *effigy* ni Bush sa rali sang masobra 500 katawo. Sa Rio de Janeiro, ginsabyahan sang mga nagaprotesta sang pula nga pintura ang konsulada sang US bilang simbolo sang ila kaakig.

Sa Colombia, 200 nga nakamaskara nga estudyante ang nagpintura sang mga islogan nga anti-US sa mga pader sang Bogota National University. Nanawagan sila nga ibasura ang US-Colombia Free Trade Agreement na ginpirmahan sadtong Nobyembre 2006. Ginaakusaran man nila ang US sang pagpasilabot sa mga pangsulod nga halambalanon sang Colombia paagi sa pagpadala sang \$700 milyon nga ayuda militar kada tuig.

Sa Buenos Aires, Argentina, ginpangunahan ni Pres. Hugo Chavez sang Venezuela ang isa ka anti-US nga rali nga gintambungan sang 20,000 katawo. Ginkundenar ni Chavez ang mga imperyalistang polisiya sang rehimeng Bush. Ginkastigo man niya ang kuno bulig nga ginapromisa ni Bush nga siling niya pagpanabotahe kag pagpaniplang sa pumuluyo.

Sa Uruguay, nagrali ang masobra 6,000 katawo. Ginpuntarya nila sang mga bato ang McDonalds, isa ka Amerikano nga kalan-an, samtang nagapaabot si Bush sa hotel nga sakay sa isa ka *bullet-proof* nga kotse. Ang martsa gin-organisa sang isa ka pederasyon sang mga unyon sang mamumugon kag iban pa nga grupo.

Sa Asunsion, Paraguay, nagprotesta man ang ila pumuluyo sa atubang sang embahada sang US bisan nga wala mag-agi didto si Bush.

Sa Guatemala, naghimo ang mga lider-tumanduk sang mga ritwal agud "limpyuhan" ang mga sagrado nila nga lugar sa Iximche kag matabog nila ang malain nga ispirito nga dala sang pagbisita ni Bush didto. Ginpakamaut sang mga militante nga Guatemalan ang pagpang-ipit sang rehimeng Bush sa mga migrante nga ara sa US kag ang paglunsar sini sang gera nga agresyon.

Sa Mexico, ang ulihi nga pungsod nga ginbisita ni Bush, nagmartsa ang ginatus-gatos nga demonstrador sadtong Marso 13 sa atubang sang embahada sang US. Ginbatuan sang mga nagprotesta ang riot police kag ginsamad nila ang mga barikada. Nagsunog sila sang bandera sang US. Makahas nga ginbungkag sang mga pulis ang ila kubay.

53 pulis, namatay sa reyd sang mga gerilya sa India

SINGKWENTA'Y tres nga pulis ang namatay sang atakehon sang mga gerilya sa idalum sang Communist Party of India-Maoist (CPI-M) ang isa ka hedkwarters sang pulisya sa Rani Bodli, Raipur, sa estado sang Chhattisgarh sadtong Marso 14. Namatay sa opensiba ang 37 upisyal kag 16 nga ordinaryong pulis.

Masobra 40 tuig nga nagalunsar sang inaway banwa ang CPI-M. Suno sa mga report, kontrolado na subong sang CPI-M ang 10 sa 16 nga distrito sa bilog nga Chhattisgarh kag may presensya man ini sa 14 nga iban pa nga estado sa India. Nagasaludo ang PKP sa CPI-M sa pinakaulihi sini nga kadalag-an. Siling sang PKP, "Ang kadalag-an sang taktikal nga opensiba sang aton mga kaupod nga Indian sadtong Marso 14 nagalanog sa bilog nga kalibutan kag nagahatag inspirasyon sa tanan nga ginapigos kag ginahimuslan nga magrebolusyon kag isulong ang ila paghimakas batuk sa reaksyunaryong pagginahum kag sistema sa taga-tagsa ka pungsod."

Mga rali sa anibersaryo sang gera sa Iraq, ginlunsar

GINATUS-GATOS ka libo nga pumuluyo sa US kag iban pa nga pungsod ang nagrali halin Marso 17 para dumdumon ang ikaapat nga anibersaryo sang pagsalakay sang US sa Iraq sining Marso 20 kag ipamilit ang gilayon nga pagtapos sang gera.

Sa US, ginpangunahan sang koalisyon nga United for Peace and Justice ang mga martsa sa nagkalain-lain nga syudad. Libu-libo ang nag-upod sa mga aksyong protesta sa mga syudad sang New York, Washington D.C., San Francisco, Portland kag iban pa. Sa guwa sang US, pinakadaku ang nangin paghulag sa Spain, kon sa diin nag-abot sa 100,000 ang nagtambong. Naglunsar man sang mga martsa-rali sa iban pa nga kabisera sa Europe kag sa Australia.

Samtang, sa US, nakatakda nga pagabotohan sa US House of Representatives ang hagna nga paulion na ang mga tropa sang US sa Iraq pag-abot ang Setyembre 1, 2008 ukon mas temprano pa. Padayon nga nagapakatig-a si Pres. George W. Bush sang US batuk sa ano man nga plano nga gilayon magatapos sang gera sa Iraq.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVIII No. 6
Marso 21, 2007
www.philippinerevolution.net

Editorial


Pamatukan ang pasistang kalakasan kag pagpanglupig

Padayon nga nagadamu kag nagalapad ang kubay sang mga organisasyon kag indibidwal sa sulod kag guwa sang pungsod nga nagakundena sa wala untat nga kampanya sang pangpulitika nga pagpamatay batuk sa katapu kag lider sang mga progresibong organisasyon. Pero tanan nga ini lunsay gi-nabastos ni Gloria Arroyo sa pagpasingki sang pasista nga pagpamatay, pagpamwersa kag pagpang-atake sang iya mga armadong tinawo batuk sa pumuluyo kadungan sang iya pakuno-kuno kag pakitang-tawo bahin sa “pagpaluntad sang demokrasya.”

Sining nakaligad nga sinimana, kadungan sang madamu nga pagpatay, partikular nga gintarget sang mga *death squad* sang militar ang mga nagbulig kag nagtindog nga saksi sadtong Pebrero sa imbestigasyon nga ginhimo sang United Nations sa lapnagon nga pagpamatay.

Wala pa sang duha ka simana nga nakahalin sa pungsod ang misyon nga ginpamunuan ni Prof. Philip Alston, UN Special Rapporteur for Extrajudicial Executions, ginpatay sa Digos City si Renato Torrecampo Pacaide, isa ka lider-mangunguma nga nagbulig nga mainterbyu sang misyon ang mga saksi kag pamilya sang pila ka biktima. Makalipas ang walo ka adlaw, ginpatay naman sang militar si Siche Gandinao, isa ka lider-mangunguma nga nagtestigo batuk sa AFP sa nasambit nga imbestigasyon. Nagpamahug ang militar nga igasunod pa gid nila ang isa pa ka saksi, ang utod ni Siche nga si Divina.

Ang pagpatay sa mga saksi sa mga pagpamatay nagapatampok sa labing kapintas kag wala’y pili sang mga pasistang pinuno kag gaway sang rehimeng Arroyo. Desperado sila nga papason ang pinakamatutom nga mga pwersa nga nagabuyagyag kag nagapakamalaut sa mga pasistang krimen sang rehimen kag



iban pa nga mabug-at nga sala si-
ni sa banwa.

Kadungan sang nagapadayon nga pagpamatay, labing ginapasingki kag ginapaspasan man sang rehimeng Arroyo ang katuwang sini nga taktika—ang paglunsar mahigko nga “ligal” kag ekstraligal nga paagi sang pagpanamad, pagpang-ipit kag pagpanglupig sa mga progresibong pwersa kag sa mga organisasyon, partido kag lider nila.

Katuyuan sang rehimen nga iduso ang mga ini sa

**Mga tampok
sa isyu nga ini...**

**Militarisasyon sa
Kamaynilaan** PAHINA 4

**Pagpang-ipit
sa mga progresibo,
ginpasanyog** PAHINA 5

**Padihut batuk kay
Satur Ocampo sa Leyte**
PAHINA 6

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com